

**Date – 08/03/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Khawvel pumah hmeichhiate Ni 'International Women's day' vawi 115 na chu ram pumah hman a ni a,
2. Mizoram-ah pawh hmun hrang hrangah hman a ni.
3. Naktuk Assembly Budget session-ah Mizo tawng India Constitution Schedule 8-na a dah tura rawtna official resolution sawiho a ni ang.
4. West Asia-a indona a chhuah hnu, March ni 1 atanga ni 7 inkar chhung khan Gulf ram hrang hranga India mi tangkhang 52,000 chuang, India ramah him taka hruai haw an ni tawh.

<><><>

**INTERNATIONAL WOMEN’S DAY**

Khawvel pumah vawiin khan Hmeichhiate Ni, International Women’s Day hman a ni a, kumina he ni thupui atan “Rights. Justice. Action. For ALL Women and Girls.” tih hman a ni a, hmeichhiate chanvo leh dikna tih chak a tulzia te, khawvel pumah mipate nen intluk tlanna a awm theihna tur hmalakna tihchak a pawimawhzia tarlanna ni atan hman a ni.

He ni pual hian ramchhung hmun hrang hrangah hun hman a ni a, New Delhi-a Manekshaw Centre-a he ni lawmna chu President Droupadi Murmu-in a hmanpui a, Women & Child Development Minister, Annpurna Devi leh Union Minister of State, Savitri Thakur-i te pawh an tel a, Women & Child Development Ministry-in Kartavya Path-ah Shakti Walk a buatsaih bawk a ni.

<><><>

## IWD

'International Women's day' vawi 115 na chu Mizoram-ah pawh hmun hrang hrangah hman a ni.

International Womens Day Committee, February ni 19-a Social Welfare Women and Child Development Minister Pi Lalrinpuii kaihhruaina hnuaiia thukhawm chuan IWD chu ni 8 (Pathianni) a a tlak avangin, March ni 18 ah official function buatsaih turin a rel a. He ni ngaihlu a hmang duh te tan mahni veng leh khua-ah te leh kohhran ah te a theih ang ang a hmang tura in chahin, March thla chhung hian pawl hrang hrang te chu he ni pual hian program hrang hrang hmang tur a ngen an ni baw. Kumin International Women's Day thupui-ah 'Pekin lukhawng a nei' tih chu thlan a ni a, hemi ni ah hian kawng tingrenga hmeichhe hlawhtlinna inlawmpui sak a, hmasawn zel tura in fuih tawn na hun neih te, mipa leh Hmeichhia inkar zau lutuk tih zim zel - zirna kawng a ni emaw, hruaitu nihna kawng ani emaw, hmeichhe chungah hleihlenna thleng thin te leh hnathawh inang hlawh inang chungchanga awareness neih te. Thupui in a a ken anga - mahni phak taw. Hmeichhia inkar zau lutuk te tanpui leh lekha thiam zawk ten midang tan a luan chhuah te, rorel tu te pawhin hmeichhiate a theih ang ang a chawi san kawng a hmalak te a ni.

Women & Child Development Director Pi Zoramthangi Chhangte chuan Mizorama hmeichhiate dinmun chungchanga kawng tam takah an dinmun a tha tia sawi a nih lain mahni inchungkhura hleihlenna tuar an tam thu a sawi a, rilru puthmang thlak a tul a ni ati.

IWD pual hian zonun ze mawi nen a kalkawp tlat bai in suah tawnin nu tam takin bai an in suah tawn a. He induhsakna hmang hian hlim takin thenawm khawveng ten he hun hi an hmang a ni. Mizoram Gorkha Women Association Branch hrang hrang ten IWD pual hian hmun hrang hrangah mi harsa te thil pek, khawlai a ei leh in tur nei lote tan chaw pek leh hnathlang te an huaihawt a, tunkar chhungin program hrang hrang an hmang dawn baw a ni.

Kohran thenkhat pawhin vawiin International Women's Day pual hian hun an hmang a, Catholic kohhran chuan Christ the king Cathedral Kulikawn-ah chawhma hun chu International women's day anih angin hmeichhia te inkhawm chanvo pek an ni a. Roman Catholic kohhran hnuaiia kohhran hrang hrang te chuan Banner te siam in, Director Diocese Catholic Hmeichhe Pawl thuchah chhiah chhuah a ni. Salvation Army Women's Ministries IET pawhin namin lam atang khan IWD pual hian hun an hmang a. Tanpui ngai te puin bakah IWD Discount te an huaihawt a a. Vawiin inkhawmah pawh minute 10 chu Salvation Army Women Officer te tan dah in, IWD puala thu tawi sawina hun an hmang a ni. Seventh Day Adventist Hmeichhe pawl pawhin damlo inkhawm thei lo te chu IWD pualin an tlawh chhuak a, an tawngtaisak baw a ni.

<><><>

## BCM ASSEMBLY

Mizoram Baptist Kohhran Rorelna sang ber Assembly vawi 130-na Lunglei Bazar Veng Kohhran Biak in a hman mek chu zaninah a tiak ang.

March ni 4 zan atanga tan Baptist Kohhran Assembly hi ni thum chhung ro an rel hnuin nimin thleng khan chhunzawm a ni. An rorel inkhawm hi President thar Rev. Prof. R .Zolawma'n a kaihruaia, President Elect atan Rev Dr R Lalthanmawia thlan a ni a, an thurel langsar zingah Baptist English School (BES) awmna hmun sawn, Inneihna a hautak lo zawnga buatsaih tih te, Kohhran mi Politics a in hmangate laka BCM-in beiseina a neih dan hrang hrang tarlan te puanchhuah tura ruahmanna te pawm ani a, Pastor Bial thar hawn belh leh siam rem te, ruihhlo ngaite tana Half Way Home din te, hlemhletna dona kawngah BCM hian chak zawka hma lak, Sri Lanka-a Mission station buatsaih leh rawngbawlina zau zawk neih, Hnahthiala Baptist Hihger Secondary school din tih te rel Ani bawk. Aizawl khawpuiah Christian hospital BCM-in a din theih nan hma lak ni rawh se tih chu zirchian leh phawt nise, an ti bawk. Kum 2026-27 sum hmuh zat tur beisei pum pui cheng vaibelchhe 143 nuai 64, sing 9 leh sang 5 chu pawm a ni a. Heta tanga Kohhran thawh tur chu cheng vaibelchhe 96, nuai 88 sing 8 leh sang 5 niin bial leh tualchhung kohhran thawh tur tuk zat tur la siam fel leh a ni ang.

Vawiin Pathianni inkhawmah Pro Pastor atan mi 9 leh Missionary 2 Pastor atan President Rev Dr Zolawma'n a nemnghet. Kum 2027 Assembly chu BCM Zotlang Serkawn ah nghah ani a, kum 2028-ah BCM Zobawk Ebenezer ah nghah a ni ang. Assembly rorel palai zawng zawng hi 1,521 an ni a, an zinga upa ber chu kum 90 a upa Upa F. Aihnuna BCM Ramhlun North a ni. Pawn lam atanga rawn hmanpuitu palai leh chhimtu dang mi 32 an awm bawk.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## ASSEMBLY SESSION

Naktuk chawhma dar 10 leh a chanve atanga Assembly Budget session chhunzawm turah Mizo tawng India Constitution Schedule 8-na a dah tura rawtna official resolution sawiho a ni ang.

Naktuk dar 10 leh a chanve a assembly session tan a nih hunah darkar khat chhung chu zawhna leh chhanna hun atan hman a ni ang a. Chumi zawhah chuan Finance changtu Chief Minister Pu Lalduhoma'n Economic Survey, Government of Mizoram 2025 – 2026 a pharh ang a. Education Minister Dr. Vanlalhlana'n India Constitution schedule pariatna angin Mizo tawng hi India ram tawng zinga pawm ni se tih resolution a pulut ang .

Minister pahnih Pu PC Vanlalruata leh Pi Lalrinpuui te department chan a sum hman tur ruahman sawiho a ni ang a, Pu PC Vanlalruata department chan a sum ruahman hi cheng vaibelchhe 242, nuai 63 leh sing 7 senna tur Agriculture & Farmers' Welfare, cheng vaibelchhe 18, nuai 81, sing 4 sang 3 hmanna tur Cooperation leh

cheng vaibelchhe 99, nuai 70, sing 8 leh sang 3 hmanna tur Irrigation & Water Resources, a vaiin cheng vaibelchhe 361, nuai 15, sing 9 leh sang 6 a ni a, Pi Lalrinpuii department enkawl a sum ruahman chu cheng vaibelchhe 909, nuai 29, sing 9 leh sang 6 hmanna tur Health & Family Welfare leh cheng vaibelchhe 326, nuai 90, sing 7 leh sang 9 hmanna tur Social Welfare, Women & Child Development, a vaiin cheng vaibelchhe 1,236, nuai 20, sing 7 sang 5 a ni.

<><><>

#### **GAS PRICE HIKE**

Mizoram sorkar Supply Department chuan Divisional LPG Sales Head, Indane Divisional Office, IOCL Silchar atanga lehkha a dawn angin tun lai khawvel hmun hrang hranga geo-politics boruak avanga India ram chhunga eirawngbawlina gas (LPG) lakluh man a to chhoh thu leh, IOCL-in LPG man zat ennawn ani a, March 7 atangin domestic LPG cylinder (14.2 kg) man chu India ram hmun dang angin Mizoramah pawh bur khatah cheng 60 in tihsan a ni a. Mizoram District zawng zawngah domestic LPG cylinder 14.2 kg rate thar cheng 1,065 chu March 7 atangin IOCL bithliah angin hman tan a ni ang.

<><><>

#### **EVACUATION IN GULF REGION**

West Asia-a indona a chhuah hnu, March ni 1 atanga ni 7 inkar chhung khan Gulf ram hrang hrang atangin India mi 52,000 chuang, India ramah him taka hruai haw an ni tawh.

Ministry of External Affairs (MEA) thupuangu, Randhir Jaiswal-a sawi danin, India ram thlawhna-ten mi 32,107 thiar lutin a bak zawng chu ram dang thlawhna hmanga phurh luh an ni. Gulf biala India mi tangkhangte hi thlawhna service khuahkhirhna thlah dul hret anih hnuah thiar chhuah an ni tih Pu Jaiswal-a chuan sawiin tangkhang dangte pawh hruai haw turin ruahmanna siam a ni, a ti.

<><><>

#### **NEPAL ELECTIONS**

Nepal parliament inthlanpui neihah rapper ni thin, Balendra Shah kaihhruai, Rashtriya Swatantra Party (RSP) chu hneh takin an tling a, sorkar thar din turin an inbuatsaih mek a ni.

RSP-in prime minister atana an candidate, Balen tia hriat lar, kum 35-a upa, Balendra Shah hian tum li Prime Minister ni tawh, CPM-UML candidate, KP Sharma Oli chu vote sing 5 velin a hneh a, Nepal ram prime minister naupang ber anih dawn bakah Madhesi mi prime minister ni thei hmasa ber a ni dawn a ni.

Prime Minister Narendra Modi-a chuan Nepal sorkar leh mipuite chu hlawhtling taka inthlanpui an nei theih avangin lawmpuina a hlan a, India chu Nepal sorkar thar leh mipui tan nghet takin a ding zel ang, a ti bawk.

<><><>